

ODLUKA O ČLANARINI VANJSKOTRGOVINSKOJ KOMORI BOSNE I HERCEGOVINE ZA 2022. GODINU*

("Službeni glasnik BiH", broj 3/22)

I. Opšte odredbe

Član 1.

Ovom odlukom propisuje se osnovica, stopa, način plaćanja i druga bitna pitanja u vezi sa članarinom koju članovi plaćaju Spoljnotrgovinskoj komori Bosne i Hercegovine u 2022. godini.

Član 2.

Članstvo u Spoljnotrgovinskoj komori Bosne i Hercegovine (u daljem tekstu: Komora) je na osnovu člana 3. Zakona o Spoljnotrgovinskoj komori Bosne i Hercegovine ("Službeni glasnik BiH", br. 30/01 i 72/13) obavezno za sva privredno-pravna lica registrovana u Bosni i Hercegovini za obavljanje poslova u inostranstvu.

Iz sredstava obrazovanih po osnovu članarine finansiraju se aktivnosti Komore, kao samostalne, nevladine, nepolitičke i neprofitne asocijacije privrednih subjekata.

Član 3.

Privredno-pravno lice (u daljem tekstu: član) je u obavezi izmirivati članarinu Komori po osnovu:

- a) realizovanog uvoza ili
- b) bruto plate zaposlenih.

Član 4.

Članu Komore može se obračunati članarina samo po jednom od osnova iz prethodnog člana, a prema raspoloživim podacima.

Član 5.

Maksimalna mjesečna članarina utvrđena pojedinačnom članu ne može da bude veća od tri prosječne neto plate u BiH isplaćene u 2021. godini, prema službenim podacima Agencije za statistiku BiH.

Minimalna mjesečna članarina iznosi 20,00 KM.

II. Članarina po osnovu realizovanog uvoza

Član 6.

Članu Komore koji je u 2021. godini imao realizovan spoljnotrgovinski promet osnovicu za obračun godišnje članarine čini ukupna vrijednost uvezene robe u BiH u 2021. godini.

Stopa članarine iz ovog člana iznosi 0,1%.

III. Članarina po osnovu bruto plate

Član 7.

Banke, osiguravajuća društva, privredno-pravna lica iz oblasti građevinarstva i privredno-pravna lica iz oblasti transporta, komunikacija i usluga (drumski saobraćaj, željeznički saobraćaj, vazdušni saobraćaj, djelatnost putničkih agencija i turoperatora, poštanske aktivnosti, telekomunikacije i ostale prateće djelatnosti te ostale kompanije koje ostvaruju prihod po osnovu usluge u inostranstvu), kao i drugi članovi Komore kojima se članarina ne obračunava u skladu sa članom 6. ove odluke, plaćaju godišnju članarinu koja se obračunava u odnosu na bruto platu.

Naučnoistraživačke i obrazovne institucije, udruženja građana koja u svojoj registraciji imaju privrednu djelatnost, savezi, interesne asocijacije, fondacije, zaklade i druge organizacije koje obavljaju djelatnost od značaja za privredu, kao pojedinačni ili kolektivni članovi, koji su članstvo u Komori stekli u skladu sa članom 6. stav 4. i 5. Statuta Komore, plaćaju godišnju članarinu koja se obračunava u odnosu na bruto platu.

Osnovica za obračun članarine iz ovog člana je iznos bruto plate iskazan u završnom računu kod nadležne institucije za 2021. godinu (Finansijsko-informatička agencija Federacije BiH i Agencija za posredničke, informatičke i finansijske usluge Republike Srpske).

Stopa članarina iz ovog člana iznosi 0,2%.

* Odluka je objavljena u "Službenom glasniku BiH", broj 3/22 od 21. januara 2022. godine, a stupila je na snagu i primjenjuje se od 1. januara 2022. godine.

IV. Minimalna članarina i umanjenje

Član 8.

Član Komore koji je osnovan u 2022. godini ne plaća članarinu za 2022. godinu.

Član Komore kojem članarina nije utvrđena u skladu sa članom 6. i 7. ove odluke plaća minimalnu mjesečnu članarinu u iznosu od 20,00 KM, odnosno 60,00 KM tromjesečno.

Član 9.

Članu Komore koji je u iskazanom ukupnom prihodu za 2021. godinu ostvario više od 30% po osnovu prihoda na inostranom tržištu (izvoza), obračunato zaduženje članarine se umanjuje za 20%.

Umanjenje članarine vrši se na osnovu zahtjeva člana Komore, uz koji se dostavlja bilansa uspjeha za 2021. godinu.

Član 10.

Članu Komore koji obavlja lohn posao, odnosno ostvaruju uvoz radi izvoza, obračunato zaduženje moguće je umanjiti na njegov zahtjev uz koji se dostavljaju dozvola za obavljanje lohn posla u 2021. godini koju je izdala Uprava za indirektno oporezivanje Bosne i Hercegovine i PDV prijave za 2021. godinu koje dokumentuju vrijednost uvoza, kao osnovicu za obračun.

V. Način plaćanja

Član 11.

Ukupna godišnja članarina za 2022. godinu dijeli se na četiri jednaka dijela i plaća tromjesečno.

Član Komore vrši plaćanje članarine na osnovu obavještenja o osnovici i visini članarine koje mu Komora dostavlja posebno za svako tromjesečje.

Uplata članarine po osnovama propisanim ovom odlukom vrši se na račune Komore koji se vode kod poslovnih banaka.

VI. Završne odredbe

Član 12.

Generalni sekretar Komore je ovlašten da angažuje sredstva u cilju pribavljanja podataka za obračun članarine od institucija koje raspolazu zvaničnim podacima, odnosno od pravnih lica čije podatke su verificovale zvanične institucije.

Član 13.

Stupanjem na snagu ove odluke prestaje da važi Odluka o članarini Spoljnotrgovinskoj komori Bosne i Hercegovine broj 01-1-01-1-1434- 10/20 od 17. 12. 2020. godine ("Službeni glasnik BiH", broj 3/21; "Službene novine Federacije BiH", broj 3/21; "Službeni glasnik RS", broj 20/21; "Službeni glasnik Brčko distrikta BiH", broj 5/21).

Član 14.

Ukoliko Skupština Komore u 2022. godini ne donese odluku o članarini za 2023. godinu, ova odluka će se primjenjivati do donošenja odluke o članarini za 2023. godinu.

Član 15.

Ova odluka stupa na snagu i primjenjuje se od 1.1.2022. godine a objaviće se u "Službenom glasniku BiH", "Službenim novinama Federacije BiH", "Službenom glasniku RS", "Službenom glasniku Brčko distrikta BiH" i na internetskoj stranici Komore.